

# **Odluka Visokog predstavnika o izmjenama i dopunama Zakona o bankama Federacije Bosne i Hercegovine**

Koriste?i se ovlaštenjima koja su mi data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja pomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem Visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivaju?i se na stav XI.2 Zaključaka Vijeća za implementaciju mira koje se sastalo u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim,” u vezi sa određenim pitanjima, uključujući (u skladu sa podstavom (c) ovog stava) i “mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Smatraju?i da Zakon o bankama Federacije BiH ne daje ovlaštenja privremenom upravniku banke da isplati, čak i kada za to ima sredstva na raspolaganju, depozite malim deponentima – fizičkim osobama prije nego što dostavi pismeni izvještaj Agenciji za bankarstvo o finansijskom stanju i budućim perspektivama banke za čijeg upravnika je postavljen;

Konstatiraju?i da bi za okončanje sadašnjeg rada na izmjenama i dopunama važećeg Zakona o bankama Federacije BiH, kao i za usvajanje izmjena i dopuna od strane federalnih organa moglo trebati nekoliko mjeseci;

Imaju li na umu potrebu za jačanjem povjerenja javnosti u vjerodostojnost bankarskog sistema i potrebu da se osigura da *bona fide* mali deponenti banke koja je pod privremenom upravom ne moraju nepotrebno čekati na vraćanje depozita;

Uzevši u obzir sve gore navedeno, donosim slijedeću

ODLUKU O IZMJENAMA I DOPUNAMA  
ZAKONA O BANKAMA FEDERACIJE BOSNE I HERCEGOVINE

Član 1.

U Zakonu o bankama Federacije Bosne i Hercegovine ("Službene novine Federacije BiH", br. 39/98 i 32/00) u članu 57. u stavu 3. dodaje se nova tačka 8. koja glasi:

"8. izvrši isplate depozita fizičkih osoba u okviru sredstava koja su na raspolaganju i na *pro rata* osnovi ako je primjenljivo. U zavisnosti od toga kolike su rezerve za prioritete 1. i 2. iz člana 63. ovog zakona, najveći iznos koji se isplaćuje fizičkoj osobi biće ukupan iznos svih njenih depozita, umanjen za bilo koji zakonski ili ugovorni dug koji banci duguje fizička osoba ili iznos od 5000 KM, tj. iznos koji je manji od ta dva. Depoziti neće obuhvatiti sredstva koja su položena na bilo kojem računu čije vlasništvo nije transparentno ili bilo koji depozit koji nije uplaćen na ime ili sredstva koja se čuvaju u bančinom sefu. Isto tako neće biti obuhvaćena sredstva, krediti ili bilo koja druga transakcija za koju su fizičkoj osobi isplaćene kamate, bez obzira da li preferencijalne ili druge vrste, i/ili bilo koje druge finansijske olakšice od strane banke koje su mogle doprinijeti pogoršanju finansijskog stanja banke. Članovi nadzornog odbora, upravnog odbora, rukovodstva banke, dioničari s učešćem od najmanje pet (5) % u osnovnom kapitalu banke i osobe nadležne za provođenje zakonom propisane revizije i kontrole knjigovodstvene dokumentacije banke nemaju pravo na bilo kakvu isplatu. Članovi uže porodice, srodnici osoba iz prethodne rečenice po krvi i po tazbini do trećeg stepena, kao i treće osobe koje postupaju u ime tih osoba takođe

nemaju pravo na bilo kakvu isplatu.”

## Član 2.

Zakon o bankama Federacije Bosne i Hercegovine ostaje neizmijenjen u svakom drugom pogledu.

## Član 3.

Ova Odluka stupa na snagu odmah i biće objavljena, što je prije moguće, u “Službenim novinama Federacije Bosne i Hercegovine”.

Sarajevo, 6. novembar 2001. god.

Wolfgang Petritsch

Visoki predstavnik